

**ZAPISNIK**  
**O RADU 29. RADNE SJEDNICE SKUPŠTINE KANTONA SARAJEVO ODRŽANE**  
**06.03.2026.GODINE SA POČETKOM RADA U 09,00 SATI**

Dvadeset i devetu radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Nakon intoniranja državne himne, predsjedavajući je pozvao zastupnice i zastupnike da odaju počast pripadnicima Armije R BiH i MUP-a R BiH koji su dali svoje živote u odbrani od agresije na Bosnu i Hercegovinu, svako na svoj način.

Potom je uputio pozdrave zastupnicama i zastupnicima u Skupštini Kantona Sarajevo, članovima Vlade Kantona Sarajevo, svim prisutnim u sali, kao i predstavnicima medija koji prate rad sjednice.

Sjednici je prilikom otvaranja prisustvovalo 29 zastupnica i zastupnika, a ostali su se priključili tokom sjednice.

U skladu s naprijed iznesenim, prisustvo zastupnika 29. Radnoj sjednici je bilo sljedeće:

**SDA - STRANKA DEMOKRATSKE AKCIJE**

1. Dević Mahir
2. Izetbegović Sebija
3. Kalem Adi
4. Kapidžić Faruk
5. Selmanović Faruk
6. Viteškić Smiljana
7. Zahiragić Haris

**POLITIČKA ORGANIZACIJA "NAROD I PRAVDA"**

1. Čampara Aljoša
2. Kristić Danijela
3. Mehmedagić Mersiha
4. Okerić Elvedin
5. Pobrić Rusmir
6. Vreto Elvis

**SOCIJALDEMOKRATSKA PARTIJA BOSNE I HERCEGOVINE**

1. Avdić Samir
2. Čičić Davor
3. Kapo Belma
4. Pekić Jelena
5. Petrović Kristina
6. Vikić – Musić Vedrana

## **POLITIČKA ORGANIZACIJA GRAĐANA "NAŠA STRANKA"**

1. Bešlija Vildana
2. Handžić Vibor
3. Klarić Sanela
4. Melank Miomirka

## **STRANKA ZA BOSNU I HERCEGOVINU**

1. Bandić Muamer
2. Gavrankapetanović-Smailbegović Fatima
3. Šaljić Jasmin

## **DEMOKRATSKA FRONTA**

1. Hašimbegović Marijela
2. Pilav Ilijaz
3. Vujović Vedrana
4. Zuhrić Albin

## **SAMOSTALNI ZASTUPNICI**

1. Hodžić Admela
2. Gaković Elza
3. Lemezani Redžo
4. Memić Arijana
5. Mesihović Adna

U radnom dijelu sjednice, predsjedavajući je upoznao zastupnike da je Kolegij Skupštine Kantona Sarajevo na sjednici održanoj 24.02.2026. godine utvrdio Prijedlog dnevnog reda današnje 29. Radne sjednice, a da je nakon toga, u skladu sa članom 73. Poslovnika, dostavljen zahtjev za izmjenu Prijedloga dnevnog reda 29. Radne sjednice od strane klubova zastupnika Stranke za Bosnu i Hercegovinu, Stranke demokratske akcije i Demokratske fronte, zbog čega je pozvao predstavnike predlagača da upoznaju prisutne s razlozima podnošenja takvog zahtjeva.

Nakon obrazlaganja zastupnika Muamera Bandića i Mahira Devića, predsjedavajući je pozvao zastupnike da se izjasne o zahtjevu za izmjenu Prijedloga dnevnog reda 29. radne sjednice od strane klubova zastupnika Stranke za BiH, SDA i DF.

*Na osnovu rezultata pojedinačnog glasanja konstatovano je da Skupština nije usvojila zahtjev za izmjenu Prijedloga dnevnog reda 29. Radne sjednice Skupštine Kantona Sarajevo, (s 13 glasova „za“, 15 glasova „protiv“ i 4 glasa „suzdržan“).*

Zatim je predsjedavajući napomenuo da prije prelaska na utvrđivanje dnevnog reda sjednice, a u skladu sa članom 158. Stav (2) Poslovnika Skupštine Kantona Sarajevo, o prijedlozima za donošenje zakona po skraćenom postupku, Skupština odlučuje kao u prethodnom pitanju prije utvrđivanja dnevnog reda sjednice.

S tim u vezi, predsjedavajući je pozvao predstavnika predlagača, Vildanu Smajović, sekretara Ministarstva prostornog uređenja, građenja i zaštite okoliša, da obrazloži razloge za donošenje/pretresanje Prijedlog zakona o izmjenama i dopunama Zakona o komunalnoj čistoći, po skraćenom postupku.

Nakon izlaganja sekretara Ministarstva, predsjedavajući je otvorio raspravu o skraćenom postupku, u kojoj su učestvovali zastupnici: *Mahir Dević, Faruk Selmanović, Haris Zahiragić, Muamer Bandić, Albin Zuhrić, Faruk Kapidžić i Vedrana Vujović.*

U međusobnom repliciranju su učestvovali zastupnici: *Haris Zahiragić – Albin Zuhrić, Muamer Bandić – Albin Zuhrić, Haris Zahiragić – Faruk Kapidžić.*

Ispravku krivog navoda je koristila zastupnica *Vildana Bešlija.*

Poslovničku intervenciju su imali zastupnici: *Mahir Dević i Muamer Bandić.*

U toku diskusija na zahtjev predsjedavajućeg Kluba Stranke za BiH data je petnaestominutna pauza.

Zaključivši diskusiju, predsjedavajući je pozvao zastupnike da pristupe izjašnjavanju da se Prijedlog zakona o izmjenama i dopuni Zakona o komunalnoj čistoći, donese (pretresa) po skraćenom postupku.

***Na osnovu rezultata pojedinačnog glasanja konstatovano je da Skupština nije usvojila prijedlog da se Prijedlog zakona o izmjenama i dopuni Zakona o komunalnoj čistoći, donese (pretresa) po skraćenom postupku, (s 5 glasova „za“, 10 glasova „protiv“ i 16 glasova „suzdržan“).***

Nadalje, prešlo se na utvrđivanje dnevnog reda sjednice.

Nakon čitanja dnevnog reda, predsjedavajući je pozvao zastupnike da se izjasne o istom.

***Na osnovu rezultata glasanja, konstatovano je da je Dnevni red 29. Radne sjednice Skupštine Kantona Sarajevo usvojen većinom glasova (s 19 glasa „za“, 12 glasova „protiv“ i bez glasova „suzdržan“), i isti glasi:***

1. Poslanička/zastupnička pitanja inicijative i odgovori;
2. Prijedlog Odluke o prihvatanju ostavke premijera i razrješenju Vlade Kantona Sarajevo;
3. Prijedlog Odluke o prihvatanju ostavke i razrješenju zamjenice pravobranioca Pravobranilaštva Kantona Sarajevo;
4. Prijedlog Odluke o imenovanju Nezavisnog odbora Skupštine Kantona Sarajevo;
5. Nacrt Zakona o izmjenama i dopuni Zakona o komunalnoj čistoći;
6. Nacrt Zakona o legalizaciji građevina i drugih izvedenih radova u prostoru izgrađenih bez odobrenja za građenje;
7. Nacrt Zakona o izmjenama i dopunama Zakona o unutrašnjim poslovima Kantona Sarajevo;
8. Nacrt Zakona o izmjenama i dopunama Zakona o policijskim službenicima Kantona Sarajevo;
9. Nacrt Zakona o nabavljanju, držanju i nošenju oružja i municije;
10. Prijedlog Odluke o zaštiti izvorišta vode za piće „Djevojačke vode“;
11. Nacrt Privremene odluke o zaštiti izvorišta vode za piće „Sarajevsko polje“;
12. Nacrt Odluke o zaštiti izvorišta vode za piće „Peračko vrelo“.

Predsjedavajući je napomenuo da su zastupnici, također, uz poziv za sjednicu dobili i sljedeći informativni materijal:

- Informacija o provođenju Zakona o prijavljivanju i postupku provjere podataka o imovini nosioca javnih funkcija u Kantonu Sarajevo;
- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec novembar 2025. godine;

- Izvještaj o radu policijskog komesara Uprave policije Ministarstva unutrašnjih poslova Kantona Sarajevo za vremenski period juli-septembar 2025 godine
- Izvještaj o radu policijskog komesara Uprave policije Ministarstva unutrašnjih poslova Kantona Sarajevo za vremenski period oktobar-decembar 2025 godine.

## **TOK SJEDNICE**

Predsjedavajući je najavio prvu tačku dnevnog reda u 10 sati i 40 minuta, te je dao petnaestominutnu pauzu, nakon čega je predsjedavanje sjednicom preuzeo dopredsjedavajući Vibor Handžić.

### **AD – 1.**

#### ***POSLANIČKA/ZASTUPNIČKA PITANJA, INICIJATIVE I ODGOVORI***

Dopredsjedavajući Handžić je otvorio tačku dnevnog reda i dao riječ prvom prijavljenom zastupniku.

**Zastupnik Adi Kalem je podnio sljedeće (citiramo):** „U okviru ove tačke dnevnog reda iskoristit ću svoja zastupnička prava i podnijeti jednu inicijativu i postaviti više pitanja, od toga dva će biti, javno, ostala ću, ostala pitanja ću dostaviti pismeno i da mi se odgovori pismenim putem. Pokrećem sljedeću inicijativu, a tiče se hitnog povećanja kapaciteta ispitivača za polaganje vozačkih ispita u Kantonu Sarajevo. Obrazloženje: podnosim inicijativu kojom se od Ministarstva za odgoj i obrazovanje Kantona Sarajevo traži hitno poduzimanje mjera radi prevazilaženja problema u procesu polaganja vozačkih ispita. Naime, nakon akcije koju su u januaru 2026. godine proveli Ministarstvo unutrašnjih poslova Kantona Sarajevo i Tužilaštvo Kantona Sarajevo, a koja se odnosila na članove ispitne Komisije za polaganje vozačkih ispita, došlo je do značajnog smanjenja broja aktivnih ispitivača iz oblasti upravljanja motornim vozilima. Prema dostupnim informacijama, trenutno su aktivna svega dva člana Komisije, dok treći povremeno učestvuje u radu. Ovakva situacija dovela je do ozbiljnog zastoja u procesu organizovanja i provođenja vozačkih ispita. Kandidati koji se prijave za polaganje vozačkog ispita u Kantonu Sarajevo trenutno čekaju 20 ili više dana termin polaganja, što predstavlja veliki problem kako za same kandidate, tako i za autoškole koje provode samu obuku. Moram napomenuti da je Kanton Sarajevo najbrojniji kanton u Federaciji po broju stanovnika, jedan od najbrojnijih, te samim tim ima i najveći broj kandidata koji polažu vozačke ispite. Smanjen kapacitet ispitne komisije direktno utiče na efikasnost sistema, produžava čekanje kandidata i uzrokuje značajne finansijske i organizacione probleme za autoškole. Posebno treba naglasiti da se naknade za polaganje vozačkog ispita uplaćuju u Budžet Kantona Sarajevo, te usporavanje procesa polaganja ima i direktne fiskalne posljedice po kantonalni budžet. Udruženje autoškola i instruktora Kantona Sarajevo, prema mojim dostupnim informacijama, već se obraćalo nadležnom ministarstvu sa zahtjevom za sastanak radi rješavanja ovog problema, međutim do realizacije sastanka još uvijek nije došlo. Zbog navedenog predlažem sljedeće: da Ministarstvo za odgoj i obrazovanje Kantona Sarajevo hitno poduzme mjere za povećanje broja ispitivača iz oblasti upravljanja motornim vozilima, da se zbog nastale vanredne situacije privremeno angažuju dodatni licencirani ispitivači kako bi se smanjile liste čekanja za polaganje vozačkog ispita, i da se u najkraćem roku izvrši organizacijsko jačanje kapaciteta ispitnih komisija kako bi se omogućilo redovno i efikasno održavanje ispita, smanjile liste čekanja i spriječile daljnje štete za kandidate, autoškole i budžet Kantona Sarajevo. Interesuje me ko se, koje genije se jutros sjetilo da prilikom, je li, vršnog sata, kada su najveće gužve, od 7 do 9 sati, zatvara jednu traku u glavnoj saobraćajnici, na glavnoj saobraćajnici u gradu Sarajevu i napravio kolonu od, je li, Iliidže pa do, Socijalnog. Vjerujte mi, onaj, bilo je jako teško preći tu, tu relaciju, je li, na kraju sam skontao da je, da, da su radovi na

jednom od tramvajskih stajališta. Zar se nije moglo to tramvajsko stajalište raditi, eventualno popravljati nekad u nekim večernjim ili, ili noćnim satima, onaj, kako i struka i tehnika nalaže.“

**Zastupnica Sebija Izetbegović je podnijela sljedeće (citiramo):** „Dakle, ja imam dvije inicijative, imam 12 pitanja, od kojih ću samo jedno pročitati, naravno, ostala ću predati, očekujem usmene i pismene odgovore. Na osnovu člana 213. upućujem inicijativu prvo Ministarstvu saobraćaja Kantona Sarajevo i Ministarstvu unutrašnjih poslova Kantona Sarajevo radi dostavljanja detaljnih informacija o implementaciji i efektima sistema adaptivnog upravljanja saobraćajem na području Kantona Sarajevo. Cijeneći činjenicu da smo svakodnevno svjedoci ozbiljnih saobraćajnih zagušenja i gotovo potpunog saobraćajnog kolapsa, neophodno je utvrditi da li sistem adaptivnog upravljanja saobraćajem ostvaruje svrhu zbog koje je uspostavljen. Molim da se Skupštini Kantona Sarajevo dostave sljedeće informacije: detaljan izvještaj o funkcioniranju sistema adaptivnog upravljanja saobraćajem, uključujući da li je sistem u potpunosti operativan, na kojim raskrscima je implementiran, da li se vrši kontinuirano praćenje i prilagođavanje saobraćajnih tokova, analiza efekata sistema sa konkretnim pokazateljima da li je došlo do smanjenja vremena čekanja na raskrscima, da li je smanjen broj saobraćajnih zastoja, da li su izrađene komparativne analize prije i poslije implementacije, koliko je zaposlenih lica direktno angažovano na radu, nadzoru, upravljanju sistemom adaptivnog upravljanja saobraćajem, te u kojem radnom pravnom statusu: stalno zaposleni, ugovor o djelu, eksterni saradnici i slično, gdje se nalazi Centar za nadzor i kontrolu sistema i pod čijom je nadležnošću, da li isti funkcionira 24 sata dnevno, kopije svih ugovora zaključenih u protekle tri godine koje se odnose na održavanje sistema adaptivnog upravljanja saobraćajem, nadogradnju softverskih i hardverskih komponenti, servisiranje i tehničku podršku, kao i ukupnu vrijednost navedenih ugovora sa jasno iskazanim iznosima po godinama. Druga inicijativa je prema Ministarstvu kulture i sporta Kantona Sarajevo koja se odnosi na javni poziv za predlaganje projekata kulture radi sufinansiranja iz sredstava Ministarstva kulture i sporta Kantona Sarajevo za 2026. godinu. Cijeneći informacije koje su dostavljene od strane više udruženja koja djeluju u oblasti kulture, koje ukazuju na činjenicu da realizacija projekata javnog poziva iz 2025. nije još uvijek u potpunosti okončana, smatram da je potrebno preispitati opravdanost daljnjeg provođenja javnog, provođenja javnog poziva za 2026. godinu dok se ne razriješe postojeći problemi. Prema dostupnim informacijama, određeni broj udruženja koja su potpisala ugovore još uvijek nije primio ugovorena sredstva ili su ista isplaćena samo djelomično, iako su projekti u velikom broju slučajeva već realizirani. Od 12 pitanja, postaviti ću samo jedno koje se upravo odnosi na Ministarstvo kulture. Dakle, da li je tačna informacija da se planira zaključenje aneksa ugovora sa umanjnim iznosima sredstava, iako su projekti već realizirani u punom obimu od onih koje ste potpisali? Uputiti ću 12 pitanja na koja očekujem usmeni i pismeni odgovor. „

**Zastupnica Mimirka Melank je podnijela sljedeće (citiramo):** „Uh, ja imam jednu inicijativu. Ja se aktivno zalažem za promjenu sistema i za reformu strukturnih barijera u ostvarenju ljudskih prava i sloboda žena. I u sklopu obilježavanja 8. marta kao Dana ženskih prava i sloboda pokrećem inicijativu i predlažem osavremenjavanje i modernizaciju sistema intrapartalne njege žena na porođaju. Ne samo da tražim pratnju na porođaju kao standard, ja predlažem da se žene porođaju u odvojenim, individualnim prostorijama, uz privatnost i dostojanstvo koje zahtijeva trenutak dolaska na svijet ljudskog bića. Očekujem da kantonalno Ministarstvo zdravstva uloži maksimum napora u realizaciju ove inicijative i izradi odgovarajuće zakonske regulative, kao i sredstva koja, pronađe sredstva koja će omogućiti modernizaciju porođajnih procedura u javnom zdravstvu Kantona Sarajevo. Dostojanstven porođaj i dolazak na svijet je standard u većini evropskih zemalja. Uz pravo na brižljiv tretman, porođaj se odvija u individualnim porođajnim sobama, uz pratnju bliskih osoba ili kod kuće, uz babicu i ljekara. Osim u Bosni i Hercegovini, ovaj sistem kolektivnog porođanja je zaostao još u Srbiji i dijelovima Rumunije i Bugarske, gdje porodilišta nisu modernizovana i nemaju dovoljno kapaciteta. Zbog nedostatka resursa i infrastrukture, a još više zbog nedostatka svijesti da je ova promjena

neophodna, praksa zajedničkih sala još nije potpuno, potpuno ukinuta. Ona krši cijelu seriju ljudskih prava, prije svega pravo na privatnost zdravstvene usluge. Postoji li neka procedura koja se na muškarcima obavlja kolektivno, pitam se. Preporuke Ujedinjenih nacija i Svjetske zdravstvene organizacije su da individualne porođajne sobe trebaju postati standard. Pravo na privatnost tokom porođaja treba biti zakonski zagarantovano. Modernizacija porodilišta je prioritet kako bi se osigurala, privatnost, manje rizika i više sigurnosti u zdravstvenoj zaštiti žena, koja inače garantuje Zakon o zaštiti prava pacijenata i Zakon o zdravstvenoj zaštiti Federacije i Kantona Sarajevo. Obavljanje porođaja u zajedničkim salama, pravno i etički, je povreda dostojanstva i privatnosti, ali i diskriminacija na osnovu spola. Porođaj je isključivo žensko iskustvo, i ako se ženama uskraćuje privatnost u tom trenutku, radi se o sistemskej povredi prava koja pogađa samo jedan spol i može se smatrati diskriminacijom koja je zabranjena Zakonom o ravnopravnosti spolova Bosne i Hercegovine.“

**Zastupnik Faruk Selmanović je podnio sljedeće (citiramo):** „U skladu sa Poslovníkom, članom 213., upućujem inicijativu prema Vladi Kantona Sarajevo i Ministarstvu pravde Kantona Sarajevo da hitno izvrše provjeru načina procedure izdavanja zemljišno-knjižnih izvadaka u Kantonu Sarajevo, te da u roku od 30 dana izrade i donesu jasnu proceduru i pravilnik kojim će precizno urediti način izdavanja zemljišno-knjižnih izvadaka, identifikaciju podnosioca zahtjeva i svrhu izdavanja ovih dokumenata sa ciljem zaštite ličnih podataka imovine građana Kantona Sarajevo. Prema dostupnim informacijama iz prakse, rad zemljišno-knjižnih ureda na području Kantona Sarajevo, ZK izvadak je moguće dobiti bez adekvatne identifikacije osobe koja traži izdavanje dokumenta, odnosno bez obaveznog dokazivanja identiteta ili pravnog interesa za pristup tim podacima. Drugo, upućujem inicijativu prema Ministarstvu prostornog uređenja, građenja i zaštite okoliša Kantona Sarajevo da u roku od 30 dana pokrene program zamjene individualnih ložišta, peći na ugalj, drvo i druga čvrsta goriva sa toplotnim pumpama ili drugim ekološki prihvatljivim sistemima grijanja, uz projekat sufinansiranja od strane Kantona Sarajevo sa ciljem unaprjeđenja kvaliteta zraka. Kanton Sarajevo već godinama suočava sa ozbiljnim problemom zagađenosti zraka, naročito tokom zimskih mjeseci. Jedan od ključnih uzroka ovoga stanja jeste veliki broj individualnih ložišta u domaćinstvima koji koriste čvrsto gorivo. Cijeneći da se Vlada Kantona zadužila za 22,7 miliona eura, za poboljšanje kvaliteta zraka, znači sredstava ima, pa da na vrijeme pokrenemo prije nego što nam dođe zima, i upućujem inicijativu prema Ministarstvu za boračka pitanja Kantona Sarajevo radi hitne izrade i upućivanja u skupštinsku proceduru Zakona o kulturi sjećanja i zaštiti sjećanja na poginule borce branitelje i šehide u periodu agresije na Bosnu i Hercegovinu, kao i izradi pratećeg seta podzakonskih akata neophodnih za njegovu punu implementaciju. Kultura sjećanja na šehide, poginule borce i branitelje koji su svoje živote dali za domovinu Bosnu i Hercegovinu predstavlja temeljne vrijednosti savremenog bosanskohercegovačkog društva. Njeno očuvanje nije samo pitanje historijske memorije, već institucionalne odgovornosti prema onima koji su branili suverenitet, teritorijalni integritet i ustavni poredak Bosne i Hercegovine.“

**Zastupnica Smiljana Viteškić je podnijela sljedeće (citiramo):** „Ja imam jednu inicijativu i dva pitanja. Znači, inicijativa je upućena Ministarstvu zdravstva, Zavodu zdravstvenog osiguranja i Vladi Kantona Sarajevo. A ona je da se hitno izmijene pravilnici i finansijski limiti koji se odnose na medicinska i ortopedska pomagala za djecu školskog uzrasta. Obrazloženje: U praksi se dešava da komisije Zavoda zdravstvenog osiguranja Kantona Sarajevo određuju minimalne iznose za ortopedska i druga pomagala, slušne aparate, proteze nakon amputacije i slično, pri čemu se roditeljima nudi najjeftinija varijanta, na primjer za slušni aparat u vrijednosti 300 KM ili proteza osnovnog kvaliteta bez realne procjene dugoročnih potreba djeteta. Djeca koja pohađaju školu moraju imati funkcionalna i kvalitetna pomagala kako bi mogla ravnopravno učestvovati u nastavi, razvijati se i integrisati u društvo. Najjeftinija rješenja često ne zadovoljavaju, pa su roditelji primorani da sami finansiraju razliku u cijeni ili da pokreću javne apelacije za pomoć. Nedopustivo je da se u 2026. godini za medicinska pomagala za djecu

organizuju humanitarne akcije, jer budžet Kantona Sarajevo jasno mora podržavati prioritet, a to je zdravlje djece. Zato se kod odobravanja pomagala mora primjenjivati princip najboljeg interesa djeteta, uz obavezno mišljenje specijaliste, a ne isključivo finansijski limit. I pitanja, ako može, usmene odgovore. Obzirom da je jedno od opredjeljenja Vlade Kantona Sarajevo transparentnost, prvo pitanje: Koliko je ukupno, kolika je ukupna vrijednost javnih nabavki koje su provela ministarstva u zadnje dvije godine? I drugo pitanje: Koliko je mjera iz ekspozea premijera Uka i Programa rada Vlade realizirano do danas?“

**Zastupnica Vedrana Vujović je podnijela sljedeće (citiramo):** „Ja danas imam dva pitanja i jednu zastupničku inicijativu. Pitanja se odnose za ministra finansija i ministricu pravde i uprave. Po kojim kriterijima i na koji način se vrši postupak dodjele ugovora za infrastrukturne projekte u Kantonu Sarajevo koji se finansiraju iz kredita, odnosno sredstava Evropske banke za obnovu i razvoj, odnosno zašto su izuzeti iz Zakona o javnim nabavkama Bosne i Hercegovine ako se radi o višemilionskim projektima? Odgovor na ovo pitanje tražim usmeno i pismeno. Pitanje upućujem Ministarstvu za odgoj i obrazovanje. Kako je moguće da u Kantonu Sarajevo još nemamo plan upisa djece u vrtiće, dok roditelji sedmicama čekaju i pokušavaju doslovno uloviti mjesto u sistemu koji se ruši? Upis djece u vrtiće ne smije biti nikakva vrsta digitalne lutrije. I ko je odgovoran za kašnjenje plana i zašto kasne subvencije prema vrtićima? Odgovor na ovo pitanje tražim usmeno. Zastupničku inicijativu za hitnu dostavu i razmatranje izvještaja o radu Kantonalnog javnog komunalnog preduzeća GRAS za period od 2019. godine do 2025. godine upućujem Ministarstvu saobraćaja, odnosno Vladi Kantona Sarajevo, te da Ministarstvo saobraćaja Skupštini Kantona Sarajevo sačini i dostavi sveobuhvatnu informaciju o stanju javnog saobraćaja u Kantonu Sarajevo. Informacija treba sadržavati analizu sigurnosnog stanja sistema, tehničke ispravnosti vozila, infrastrukture, broj i strukturu saobraćajnih incidenata u posljednjih pet godina, stanje kadrovskih kapaciteta, sistem nadzora i upravljanja, kao i plan mjera za unaprjeđenje sigurnosti javnog prevoza. Odgovor na ovu inicijativu tražim pismeno u što kraćem vremenskom roku. Također, iskoristit ću priliku da napomenem da nisam dobila odgovor na inicijativu za hitnu izmjenu uredbe o načinu, uslovima i ostvarivanju prava za dodjelu stipendija borcima, braniteljima Bosne i Hercegovine i njihovoj djeci koja se realizuje putem Fonda IKRE, te molim da se Vlada očituje o njoj što prije. A ostala pitanja inicijative koja se tiču sistema EMI, studentskog centra, različitih ugovornih obaveza, kao i one obećane peletare, ću dostaviti pismeno.“

**Zastupnik Jasmin Šaljić je podnio sljedeće (citiramo):** „Ja imam dvije inicijative. Jednu za Ministarstvo obrazovanja, jednu za Ministarstvo socijale. Ovo za obrazovanje, to je inicijativa vezana je za polaganje eksterne mature nakon osnovnog obrazovanja. Tu se radi o malom broju djece koja osnovne škole završavaju u entitetu Republika Srpska, uglavnom po selima gdje nemaju nikakve uslove za školovanje. Uglavnom im neadekvatni kadrovi drže nastavu, a bosanski jezik skoro da ne izučavaju. Pa evo inicijative. Na osnovu člana 22., stav (2), Odluke o kriterijima za upis učenika u prvi razred srednjih škola Kantona Sarajevo, donesene na 66. sjednici Vlade Kantona Sarajevo, održanoj dana 6.3.2025. godine, Službene novine, broj taj i taj, Zakon o odgoju i razvoju osnovnih i srednjih škola u Kantonu Sarajevo od 11.7.2024. godine, tražim od Vlade Kantona Sarajevo i resornog ministarstva da donesu trajnu odluku bez podnošenja dodatnog zahtjeva kojom će djecu iz povratničkih porodica u manjem entitetu BiH, koja srednje obrazovanje žele nastaviti u školama Kantona Sarajevo, a koja su osnovno obrazovanje završili po planu i programu manjeg entiteta BiH, osloboditi polaganja eksterne mature. Određivanje ekvivalenta bodova za eksternu maturu uraditi na identičan način kako je gore navedenom odlukom definisano u članu 18, stav 4, za učenike sa područja Kantona Sarajevo koji iz opravdanih razloga nisu pristupili polaganju eksterne mature. Gore navedeni aktivnosti omogućiti upisu porodične djece u željene škole mimo upisnih kvota srednjih škola, kako se ne bi djeca sa područja Kantona Sarajevo našla u podređenom položaju. I jedna inicijativa od Udruženja „Žene

žrtve rata“. Mi zastupnici, svi smo dobili ovaj zahtjev. Ovo Udruženje traži da im Skupština dodijeli poseban status. Udruženje Žrtve rata Sarajevo nije u mogućnosti nastaviti rad i provoditi aktivnosti zbog nedostatka finansijskih sredstava i institucionalne podrške. Ovo Udruženje postoji već 20 godina kao nevladina i nestranačka organizacija s ciljem zaštite prava i dostojanstva žena i muškaraca koji su preživjeli ratni zločin silovanja, seksualnog zlostavljanja tokom agresije na Bosnu i Hercegovinu. Ovo je jedina smo, kaže, organizacija u Bosni i Hercegovini koja se sistematski, dugoročno i posvećeno bavi ovim izuzetno osjetljivom i društveno važnom problematikom. Tokom više od dvije decenije rada Udruženje je pružalo kontinuiranu psihosocijalnu, pravnu i savjetodavnu podršku žrtvama ratnog i seksualnog nasilja na području cijele BiH, a posebno na području Kantona Sarajevo. Evidentiralo je dokumentovane hiljade svjedočenja žrtava, čime je dalo nemjerljiv doprinos procesima tragedijske pravde. Doprinijelo je podizanju svijesti u javnosti o posljedicama ratnog seksualnog nasilja i borbi protiv stigmatizacije žrtava, izdavajući u više naučnih monografija i naučnih publikacija. Rad udruženja Žene žrtve rata ima trajnu društvenu vrijednost. Znači, ja ću ovaj zahtjev njihov da pretočim u zastupničku inicijativu i predat ću vam je, i molim da se o njoj izjasni Skupština i zastupnici.“

**Zastupnica Elza Gaković je podnijela sljedeće (citiramo):** „Ja ću za danas usmeno uputiti jedno pitanje i inicijativu, a pisanim putem poslat ću njih više. Naime, odnose se obje na Ministarstvo za odgoj i obrazovanje, a pitanje se tiče naše posjete zajedno sa ministricom i sa predsjedavajućim Skupštine Kantona Sarajevo, koja je realizovana 21.6.2024. godine u Osnovnoj školi Sokolje, gdje je Ministarstvo iskazalo opredijeljenost za poboljšanje uslova za rad i boravak učenika u školi i nastavnog osoblja. Mene zanima koje korake je Ministarstvo poduzelo za rješavanje određenih problematika, jer smo i svjesni da postoje na samom objektu škole osnovne manjkavosti i šta Ministarstvo planira da uradi od infrastrukturnih zahvata kada je u pitanju objekat Osnovne škole Sokolje. S tim u vezi, iniciram prema Ministarstvu za odgoj i obrazovanje ispitivanje konstrukcije objekta Osnovne škole Sokolje, izradu elaborata i projekat sanacije ovog objekta. Moja inicijativa danas odnosi se na isto Ministarstvo, samo druga je problematika, a to je hitno pokretanje i procedura realizacije treće faze dogradnje objekta Osnovne škole Zahid Baručija, to jeste fiskulturne sale, kako bi se obezbijedili adekvatni uslovi za nastavu, rad i boravak u školi, jer smo svi svjedoci da ova djeca rade svoj tjelesni i zdravstveni odgoj u dvorani preko puta i da su to određene manjkavosti, negodovanje zaista sa punim pravom roditelja, gdje zaista želimo da stavimo tačku na ovu problematiku i da svi zajedno pronađemo najbolje rješenje i najbolji izlaz iz ove situacije koji je prvenstveno u interesu svakog djeteta.“

**Zastupnica Adna Mesihović je podnijela sljedeće (citiramo):** „Na osnovu članova 106. i 213. Poslovnika Skupštine Kantona Sarajevo, upućujem zastupničku inicijativu Vladi Kantona Sarajevo, resornom Ministarstvu saobraćaja, kao i nadležnim institucijama na koje se sama inicijativa odnosi. Bit će dostavljena, naravno, i u pismenoj formi. Predlažem inicijativu za uvođenje obaveznih, redovnih, kao i nenajavljenih kontrola na prisustvu alkohola i opojnih droga vozača javnog prevoza u Kantonu Sarajevo. Polazeći od nedavne saobraćajne nesreće kojom prilikom se kod vozača javnog gradskog prevoza provedenim testiranjem utvrdilo prisustvo opojnih droga u organizmu, a u cilju unaprjeđenja sigurnosti saobraćaja i zaštite života i zdravlja građana Kantona Sarajevo, podnosim inicijativu za uvođenje obaveznih alkotestiranja i testiranja na prisustvo opojnih droga za sve vozače javnog prevoza. Pa sad ovdje podrazumijevam i sve vrste javnog prevoza i one u javnom vlasništvu, kao i one u privatnom vlasništvu koje imaju licencu za javni prevoz, je l' ovaj, od strane vladajućih struktura, i to prije stupanja na dužnost, kao i provođenje periodičnih i nasumičnih kontrola tokom radnog vremena. Javni prevoz svakodnevno koristi veliki broj građana, uključujući djecu, učenike, studente, radnike i starije osobe. S obzirom na visok stepen odgovornosti koji nose vozači autobusa, trolejbusa, tramvaja i minibusu, neophodno je osigurati najviše standarde profesionalne, zdravstvene i psihofizičke sposobnosti za obavljanje ovih poslova. Predlaže se uvođenje obaveznog alkotestiranja svih

vozača prije početka smjene, uvođenje testova na prisustvo opojnih droga u definisanim najavljenim intervalima, što se opet može dogovoriti sa strukom u ovisnosti od dužine zadržavanja rezidua opojnih droga u organizmu. Zatim, propisivanje javnih procedura u slučaju pozitivnog nalaza, to je privremeno udaljavanje s posla, vanredni ljekarski pregledi, kao i disciplinski postupci. Uspostavljanje saradnje sa nadležnim zdravstvenim i sigurnosnim institucijama radi provođenja kontrole, kao i izmjene i dopune relevantnih propusta, internih akata javnih preduzeća, kako bi se ova obaveza jasno definisala. Ove mjere imale bi, imale bi preventivni karakter, značajno bi smanjile rizik od saobraćajnih nesreća, te doprinijele povećanju povjerenja građana u sistem javnog prevoza Kantona Sarajevo. Molim da se što žurnije poduzmu svi koraci u pravcu rješavanja ove vrste nadzora, kako bi se spriječile sve negativne posljedice, evo, kojima svjedočimo, ovaj, u posljednje vrijeme, i vratilo izgubljeno povjerenje građana u javni gradski prevoz.“

**Zastupnica Vildana Bešlija je podnijela sljedeće (citiramo):** „Ja evo koristim priliku da, naravno, najavljenom inicijativu, je i ovaj, od strane, kolege zastupnika prije mene, a koju smo dobili svi, ovaj, na mail, da je pročitam detaljno. I evo, imam je spremljenu u ime Kluba Naše stranke, a nadam se da će imati podršku svih zastupnika i Vlade. Znači, podnosim inicijativu prema Vladi Kantona Sarajevo i nadležnom ministarstvu da pokrenu proceduru za dodjelu statusa udruženja od posebnog značaja za Kanton Sarajevo, Udruženju „Žene žrtve rata“ Sarajevo, u skladu sa važećim propisima Kantona Sarajevo, koji regulišu saradnju i podršku organizacijama civilnog društva od posebnog društvenog interesa. Udruženje „Žene žrtve rata Sarajevo“ već više od dvije decenije predstavlja jednu od najvažnijih organizacija u Bosni i Hercegovini, koja se sistemski bavi zaštitom prava i dostojanstva žrtava ratnog seksualnog nasilja. Od osnivanja 2003. godine, ovo udruženje pruža kontinuiranu psiho-socijalnu, pravnu i savjetodavnu podršku žrtvama, aktivno doprinosi procesima tranzicijske pravde, te radi na dokumentovanju ratnih zločina i svjedočenja preživjelih. Prema dostupnim podacima, Udruženje je do danas prikupilo hiljade izjava i svjedočenja žrtava, te vodilo evidenciju o počiniocima i svjedocima, čime je dalo značajan doprinos radu domaćih i međunarodnih pravosudnih institucija. Također, Udruženje je aktivno učestvovalo u zagovaranju zakonskih rješavanja i javnih politika u korist civilnih žrtava rata, te kontinuirano doprinosi podizanju svijesti javnosti o posljedicama ratnog seksualnog nasilja i borbi protiv stigmatizacije žrtava. Poseban značaj rada ovog Udruženja ogleda se i u činjenici da je na području Kantona Sarajevo evidentiran značajan broj žrtava, te da je Sarajevo administrativno i institucionalno središte Bosne i Hercegovine, gdje se i danas vode brojni procesi vezani za ratne zločine. Dodjelom statusa udruženja od posebnog značaja za Kanton Sarajevo, dodatno bi se osnažila institucionalna podrška žrtvama rata, poslala bi se jasna poruka priznanja i poštovanja prema preživjelim ratnog i seksualnog nasilja, omogućila bi se dugoročnija stabilnost rada Udruženja i kvalitetnije planiranje programa od javnog interesa. S obzirom na izuzetnu društvenu, humanitarnu i historijsku vrijednost rada Udruženja „Žene žrtve rata“, smatram da postoje jasni moralni, društveni i institucionalni razlozi da Kanton Sarajevo prepozna njih, njihov rad kao od posebnog značaja, i zato predlažem da Vlada razmotri ovu inicijativu i pokrene potrebne procedure za dodjelu navedenog statusa.“

**Zastupnica Mersiha Mehmedagić je podnijela sljedeće (citiramo):** „Imam dva pitanja i na oba tražim pismeni odgovor. Prvo pitanje upućujem Ministarstvu komunalne privrede, infrastrukture i prostornog uređenja, građenja i zaštite okoliša, odnosno Kantonalnom javnom komunalnom preduzeću RAD d.o.o. Sarajevo, gdje tražim da mi dostave detaljan prikaz, odnosno detaljnu strukturu finansiranja Kantonalnog javnog komunalnog preduzeća RAD Sarajevo po namjenama, uz detaljan prikaz kapitalnih ulaganja u periodu 2016.-2025. godina, ostvarenih prihoda, primljenih transfera od Kantona Sarajevo, jedinica lokalne samouprave, viših nivoa vlasti, domaćih i međunarodnih organizacija, te domaćih i ino-zaduženja. Drugo pitanje također postavljam istom Ministarstvu: kada je planiran početak radova na utopljavanju javnih ustanova Srednja mašinska tehnička škola i Srednja građevinsko-geodetska škola u Sarajevu? Zgrada u

kojoj se nalaze ove dvije srednjoškolske ustanove je bila uvrštena u projekat "Energetska efikasnost u javnim zgradama" Kantona Sarajevo još 2021. godine sa preostalim 39 javnih objekata, znači ukupno njih 40. Kako su učenici ove dvije škole zbog neadekvatnog grijanja prošle godine nastavu dijelom pratili u jaknama, molim da mi dostavite informaciju da li utopljavaње i rješavanje problema grijanja planirate u 2026. godini.“

**Zastupnik Mahir Dević je podnio sljedeće (citiramo):** „Imam jednu inicijativu i dva pitanja. Inicijativa se odnosi na to da ispred Kluba SDA ćemo pokrenuti inicijativu, a ponudit ćemo je, naravno, i kolegama iz SBIH-a i DF-a da se organizira tematska sjednica o stanju bezbjednosti u saobraćaju u Kantonu Sarajevo, sa posebnim osvrtom na ova tragična dešavanja u prethodnom periodu, a uzimajući u obzir činjenicu da nismo već 5 godina, 6 godina dobili izvještaj o poslovanju Kantonalnog javnog komunalnog preduzeća GRAS. To će biti inicijativa koju ćemo pokrenuti u narednom periodu. Imam dva pitanja za Ministricu pravde i uprave. Prvo pitanje je da li namjeravate pokrenuti izmjene i dopune Zakona o prijavi podataka o imovini? U praksi se do sada pokazalo zaista veliki niz nelogičnosti, od toga da ljudi nisu u stanju da formiraju školske odbore po školama, do niza nekih drugih vrlo simptomatičnih tumačenja koja često puta naginju politički prema odbrani NIP-ovih kadrova. Smatramo da je nužno, nakon proteka od nekih 6-7 godina od usvajanja tog zakona, da se pristupi izmjenama i dopunama tog zakona, da ono što se pokazalo u praksi kao loše, da ponudite jednu takvu vrstu izmjena. Da li to planirate raditi? To je prvo pitanje. Drugo pitanje za vas, tačnije za menadžment Televizije Sarajevo i za Nadzorni odbor: da li je menadžment Televizije Sarajevo, Nadzorni odbor Televizije Sarajevo ili vi iz Ministarstva pravde i uprave, da li ste podnijeli ikakvu krivičnu prijavu vezano za poslovanje nekadašnje direktorice, gospođe Duške Jurišić, koja je uposlenike Televizije Sarajevo uvela u niz sudskih procesa u kojima je televizija Sarajevo do sada izgubila pravomoćno tri presude, a procjena je da će takvih biti još u narednom periodu i da će na takav način nastati šteta po Televiziju Sarajevo veća od 200.000 KM, prema nama dostupnim informacijama u ovom momentu, a na šta smo mi kao Klub SDA prije 3, 4, 5, 6 godina upozoravali da će se takve stvari desiti zbog, evo sada konačno, čini mi se, i sudskom presudom dokazanog mobinga i svega onoga što je rađeno u smislu kršenja ugovora o radu uposlenika televizije Sarajevo? Na ova dva pitanja ću zamoliti Ministricu, ako može, da mi da usmeni odgovor, a ovu inicijativu ćemo pokrenuti u narednom periodu, zato što vidimo da kolege iz Skupštine i aktuelna većina aktivno učestvuje u nedostavljanju izvještaja u skladu sa zakonskim propisanim rokovima.”

**Zastupnik Samir Avdić je podnio sljedeće (citiramo):** „Evo, kolega Dević mi je napravio jedan lijep šlagvort za pitanje koje ću ja uputiti, s obzirom da sam jako zainteresovan i drago mi je da dijelimo taj interes za nešto što ćemo, evo, kolokvijalno nazvati svjesno činjenje štete kućama kojima smo upravljali, odnosno budžetima tih kuća. Jučer smo na pres-konferenciji spominjali tužbe u Kliničkom centru, ja sam spominjao i tužbe u GRAS-u u prošli petak. A pitanje koje bih danas postavio sam dobio od člana sindikata Zdravstvo u Kantonu Sarajevo. To pitanje je na njihovoj grupi postavio njihov predsjednik, Jasmin Avdović, a pitanje je u vezi sa navodnom tužbom koju je bivši direktor inicijala MK, tako je ovdje upisano, dobio protiv Vlade, odnosno protiv Uprave, Upravnog i Nadzornog odbora Domova zdravlja. Ovdje piše da je to bilo u vrijeme Vlade „Petak 13.“ i piše da je čovjek na osnovu te dobijene tužbe ustvari dobio pravo da od iz Budžeta Kantona Sarajevo ili Zavoda zdravstvenog osiguranja naplati blizu 300.000 KM. Ovo je veoma važna tema, baš kao i slučaj koji je kolega Dević maloprije iznio, zato što bi morali u jednom trenutku stati u kraj takvoj praksi da neko, evo, manje ili više svjesno čini štetu ustanovama ili institucijama kojima upravlja. Ja bih pohvalio ovu akciju, ovaj potez gospodina Avdovića, predsjednika tog sindikata, zato što smatram da sindikati kao naši partneri zaista trebaju da se bave i ovim stvarima, odnosno da štite finansijske interese ustanova, kolektiva koje predstavljaju, kako ovaj sindikat, tako i svi drugi.“

Nakon iscrpljene liste prijavljenih za pitanja i inicijative, dopredsjedavajući Handžić je predložio, a zastupnici jednoglasno podržali (s 20 glasova „za“), pauzu do 13:00 sati.

#### NASTAVAK NAKON PAUZE

U nastavku nakon pauze, predsjedavajući Okerić je pozvao ministre da ponude odgovore na postavljena pitanja, što su učinili: Admir Katica, ministar unutrašnjih poslova, Darja Softić-Kadenić, ministrica pravde i uprave, Naida Hota-Muminović, ministrica za odgoj i obrazovanje, te Kenan Magoda, ministar sporta i kulture.

#### **Realizacija tačke dva.**

#### **AD-2.**

### **PRIJEDLOG ODLUKE O PRIHVATANJU OSTAVKE PREMIJERA I RAZRJEŠENJU VLADE KANTONA SARAJEVO**

Zastupnici su materijal dobili uz poziv za sjednicu. Uvodne napomene je podnio predsjedavajući u svojstvu predsjedavajućeg Komisije za izbor i imenovanje i administrativna pitanja Skupštine Kantona Sarajevo, nakon čega je pozvao premijera Nihada Uka da obrazloži razloge podnošenja ostavke.

U diskusiji su učestvovali zastupnici: *Mahir Dević, Haris Zahiragić, Faruk Selmanović, Jasmin Šaljić, Faruk Kapidžić, Arijana Memić, Vedrana Vujović, Muamer Bandić, Albin Zuhrić, Miomirka Melank i Marijela Hašimbegović.*

U međusobnom repliciranju su učestvovali zastupnici: *Davor Čičić – Mahir Dević, Muamer Bandić – Mahir Dević, Jelena Pekić – Haris Zahiragić, Redžo Lemezani – Haris Zahiragić, Marijela Hašimbegović – Haris Zahiragić, Miomirka Melank – Haris Zahiragić, Vedrana Vujović – Haris Zahiragić, Vildana Bešlija – Faruk Selmanović, Marijela Hašimbegović – Faruk Selmanović, Vibor Handžić – Faruk Selmanović, Mahir Dević – Jasmin Šaljić, Albin Zuhrić – Jasmin Šaljić, Vibor Handžić – Jasmin Šaljić, Davor Čičić – Faruk Kapidžić, Muamer Bandić – Faruk Kapidžić, Haris Zahiragić – Arijana Memić, Samir Avdić – Arijana Memić, Mahir Dević – Arijana Memić, Samir Avdić – Albin Zuhrić, Belma Kapo – Albin Zuhrić, Vedrana Vikić Musić – Albin Zuhrić, Jelena Pekić – Albin Zuhrić, Vedrana Vujović – Albin Zuhrić, Faruk Kapidžić – Albin Zuhrić, Faruk Selmanović – Albin Zuhrić, Albin Zuhrić – Miomirka Melank, Elvedin Okerić – Marijela Hašimbegović, Haris Zahiragić – Marijela Hašimbegović.*

Poslovničku intervenciju su koristili zastupnici: *Davor Čičić, Haris Zahiragić, Mahir Dević, Miomirka Melank, Mahir Dević, Haris Zahiragić i Davor Čičić.*

Ispravku krivog navoda su koristili zastupnici: *Belma Kapo, Samir Avdić, Elvis Vreto, Miomirka Melank, Redžo Lemezani, Vedrana Vikić Musić, Davor Čičić, Muamer Bandić i Vedrana Vujović.*

*U međuvremenu je na prijedlog zastupnika Davora Čičića odata počast poginulom Erdoanu Morankiću.*

*U toku diskusija, a na zahtjev Kluba SDA, zastupnici su većinom glasova odobrili pauzu u trajanju od pola sata, (s 23 glasa „za“ i 1 glas „suzdržan“), nakon čega je predsjedavanje sjednicom nakratko preuzela dopredsjedavajuća Jelena Pekić.*

*Predsjedavajući je dao na glasanje inicijativu zastupnika Samira Avdića da se omogući pauza u trajanju od 90 minuta, što su zastupnici jednoglasno podržali, (s 19 glasova „za“).*

#### NASTAVAK NAKON PAUZE

Predsjedavajući Okerić je u nastavku sjednice dao riječ ostalim prijavljenim diskutantima.

U nastavku diskusija su učestvovali zastupnici: *Vibor Handžić, Samir Avdić, Elza Gaković, Vildana Bešlija, Davor Čičić, Elvis Vreto i Rusmir Pobrić.*

U međusobnom repliciranju su učestvovali zastupnici: *Sebija Izetbegović – Vibor Handžić, Faruk Kapidžić – Samir Avdić, Sebija Izetbegović – Samir Avdić, Jasmin Šaljić – Samir Avdić, Smiljana Viteškić – Elza Gaković, Jasmin Šaljić – Elza Gaković, Redžo Lemezani – Elza Gaković, Mersiha Mehmedagić – Davor Čičić.*

Ispravku krivog navoda su koristili zastupnici: *Jasmin Šaljić, Faruk Selmanović i Sebija Izetbegović.*

Zaključivši raspravu, predsjedavajući je u skladu s članom 94. Poslovnika Skupštine KS predložio, a zastupnici većinom glasova podržali da se izjašnjavaње po ovoj tački provede odmah, (s 23 glasova „za“, 1 glas „protiv“ i 1 glas „suzdržan“).

*Na osnovu rezultata glasanja, predsjedavajući je konstatovao da je Skupština jednoglasno donijela Odluku o prihvatanju ostavke premijera i razrješenju Vlade Kantona Sarajevo, (s 29 glasova „za“).*

#### **Realizacija tačke tri.**

##### **AD-3.**

#### **PRIJEDLOG ODLUKE O PRIHVATANJU OSTAVKE I RAZRJEŠENJU ZAMJENICE PRAVOBRANIOCA PRAVOBRANILAŠTVA KANTONA SARAJEVO**

Zastupnici su materijal za tačku dobili uz poziv za sjednicu. Uvodno izlaganje podnio je predsjedavajući Elvedin Okerić u svojstvu predsjedavajućeg Komisije za izbor i imenovanja i administrativna pitanja.

Obzirom da nije bilo prijavljenih zastupnika za diskusiju, predsjedavajući je pozvao zastupnike da se izjasne u skladu s Članom 94. Poslovnika Skupštine KS, *te je na osnovu rezultata glasanja konstatovano je da je Skupština jednoglasno prihvatila da se izjašnjavaње o po ovoj tački provede odmah, (s 23 glasa „za“ i 1 glas „protiv“).*

*Na osnovu rezultata glasanja konstatovano je da je Skupština jednoglasno donijela Odluku o prihvatanju ostavke i razrješenju zamjenice pravobranioca Pravobranilaštva Kantona Sarajevo, (s 24 glasa „za“).*

#### **Realizacija tačke četiri.**

##### **AD- 4.**

#### **PRIJEDLOG ODLUKE O IMENOVANJU NEZAVISNOG ODBORA SKUPŠTINE KANTONA SARAJEVO**

Zastupnici su materijal za tačku dobili uz poziv za sjednicu. Uvodno izlaganje je podnio predsjedavajući *Elvedin Okerić* u svojstvu predsjedavajućeg Komisije za izbor i imenovanja i administrativna pitanja.

U diskusiji su učestvovali zastupnici: *Muamer Bandić, Faruk Selmanović, Sebija Izetbegović, Faruk Selmanović i Elvedin Okerić.*

U međusobnom repliciranju su učestvovali zastupnici: *Muamer Bandić – Faruk Selmanović, Faruk Selmanović – Sebija Izetbegović i Redžo Lemezani – Sebija Izetbegović.*

Obzirom da nije bilo više prijavljenih diskutanata, predsjedavajući je pozvao zastupnike da se izjasne, u skladu s Članom 94. Poslovnika Skupštine KS, da se izjašnjanje po ovoj tački provede odmah.

*Nakon izjašnjanja, konstatovano je da je Skupština većinom glasova podržala da se izjašnjanje provede odmah. (s 21 glas „za“ i 2 glasa „protiv“).*

***Na osnovu rezultata glasanja, konstatovano je da je Skupština većinom glasova donijela Odluku o imenovanju Nezavisnog odbora Skupštine Kantona Sarajevo, (s 18 glasova „za“, 4 glasa „protiv“ i 2 glasa „suzdržan“).***

***Realizacije tačke pet.***

**AD- 5.**

## **NACRT ZAKONA O IZMJENAMA I DOPUNI ZAKONA O KOMUNALNOJ ČISTOĆI**

Predsjedavajući Okerić je napomenuo da s obzirom da Skupština nije usvojila prijedlog da se Zakon o izmjenama i dopuni Zakona o komunalnoj čistoći razmatra po skraćenom postupku, u skladu sa članom 158. stav 3. Poslovnika Skupštine Kantona Sarajevo, o zakonu se raspravlja kao o nacrtu.

Zastupnici su materijal dobili uz poziv za sjednicu. Uvodno izlaganje u svojstvu predstavnika predlagača je podnio ministar resornog ministarstva, *Mladen Pandurević.*

U diskusiji su učestvovali zastupnici: *Faruk Kapidžić, Faruk Selmanović, Sanela Klarić i Mersiha Mehmedagić.*

Zaključivši diskusiju, predsjedavajući je pozvao zastupnike da se u skladu s članom 94. Poslovnika Skupštine Kantona Sarajevo izjasne da li su saglasni da se izjašnjanje po ovoj tački provede odmah, što su zastupnici jednoglasno podržali (s 23 glasa „za“).

***Na osnovu rezultata glasanja konstatovano je da je Skupština po Nacrtu zakona o izmjenama i dopuni Zakona o komunalnoj čistoći većinom glasova (s 22 glasa „za“ i 1 glas „suzdržan“ donijela sljedeći zaključak:***

- 1. Utvrđuje se Nacrt zakona o izmjenama i dopuni Zakona o komunalnoj čistoći.*
- 2. Nacrt zakona iz tačke 1. ovog zaključka stavlja se na javnu raspravu.*
- 3. Učesnici u javnoj raspravi su kantonalni organi uprave, jedinice lokalne samouprave, naučne i stručne ustanove, a trajat će 15 dana.*
- 4. Primjedbe, prijedloge, sugestije i mišljenja učesnici javne rasprave dostavljaju Vladi Kantona Sarajevo putem Ministarstva komunalne infrastrukture i prostornog uređenja, građenja i zaštite okoliša, koja organizuje i provodi javnu raspravu.*
- 5. Vlada Kantona Sarajevo dužna je, nakon provedene javne rasprave, Skupštini Kantona Sarajevo dostaviti izvještaj o rezultatima javne rasprave koji sadrži primjedbe, prijedloge i mišljenja, kao i obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga zakona o izmjenama i dopuni Zakona o komunalnoj čistoći.*
- 6. Ovaj zaključak stupa na snagu danom donošenja.*

### **Realizacija tačke šest.**

#### **AD-6.**

### **NACRT ZAKONA O LEGALIZACIJI GRAĐEVINA I DRUGIH IZVEDENIH RADOVA U PROSTORU IZGRAĐENIH BEZ ODOBRENJA ZA GRAĐENJE**

Zastupnici su dobili materijal uz poziv za sjednicu. Uvodno izlaganje po ovoj tački je podnio ministar *Mladen Pandurević* u svojstvu predlagača materijala.

U diskusiji su učestvovali zastupnici: *Davor Čičić, Redžo Lemezan, Faruk Selmanović, Mersiha Mehmedagić, Samir Avdić, Vedrana Vujović i Faruk Kapidžić.*

Zaključivši diskusiju, predsjedavajući je pozvao zastupnike da se u skladu s članom 94. Poslovnika Skupštine Kantona Sarajevo izjasne da li su saglasni da se izjašnjavanje po ovoj tački provede odmah, što su zastupnici većinom glasova i podržali (s 21 glas „za“ i 3 glasa „protiv“).

***Na osnovu rezultata glasanja konstatovano je da je Skupština po Nacrtu Zakona o legalizaciji građevina i drugih izvedenih radova u prostoru izgrađenom bez odobrenja za građenje većinom glasova (s 20 glasova „za“ i 1 glas „protiv“ i 1 glas „suzdržan“) donijela sljedeći zaključak:***

1. *Utvrđuje se Nacrt Zakona o legalizaciji građevina i drugih izvedenih radova u prostoru izgrađenom bez odobrenja za građenje.*
2. *Nacrt Zakona iz tačke 1. ovog zaključka stavlja se na javnu raspravu.*
3. *Učesnici u javnoj raspravi su kantonalni organi uprave, jedinice lokalne samouprave, naučne i stručne ustanove trajat će 20 dana.*
4. *Primjedbe, prijedloge, sugestije i mišljenja učesnici javne rasprave dostavljaju Vladi Kantona Sarajevo putem Ministarstva komunalne infrastrukture i prostornog uređenja, građenja i zaštite okoliša koja organizuje i provodi javnu raspravu.*
5. *Vlada Kantona Sarajevo dužna je, nakon provedene javne rasprave, Skupštini Kantona Sarajevo dostaviti izvještaj o rezultatima javne rasprave koji sadrži primjedbe, prijedloge mišljenja, kao i obrazloženja razloga zbog kojih pojedine primjedbe, prijedlozi i mišljenja nisu prihvaćeni u pripremi prijedloga Zakona o legalizaciji građevina i drugih izvedenih radova u prostoru izgrađenom bez odobrenja za građenje.*
6. *Ovaj zaključak stupa na snagu danom donošenja.*

### **Realizacija tačke sedam.**

#### **AD-7.**

### **NACRT ZAKONA O IZMJENAMA I DOPUNAMA ZAKONA O UNUTRAŠNjim POSLOVIMA KANTONA SARAJEVO**

Zastupnicima je materijal dostavljen uz poziv za sjednicu. Ministar unutrašnjih poslova, *Admir Katica*, je podnio uvodno izlaganje u svojstvu predlagača materijala.

U diskusiji je učestvovala zastupnica *Vedrana Vujović.*

Obzirom da nije bilo više prijavljenih diskutanata, predsjedavajući je pozvao da se zastupnici izjasne u skladu s članom 94. Poslovnika Skupštine KS, te je konstatovano da su zastupnici većinom glasova podržali da se izjašnjavanje po ovoj tački provede odmah, (s 19 glasova „za“ i 2 glasa „suzdržan“).

***Na osnovu rezultata glasanja konstatovano je da je Skupština po Nacrtu Zakona o izmjenama i dopunama Zakona o unutrašnjim poslovima Kantona Sarajevo većinom glasova (s 19 glasova „za“ i 2 glasa „suzdržan“) donijela sljedeći zaključak:***

- 1. Utvrđuje se nacrt Zakona o izmjenama i dopunama Zakona o unutrašnjim poslovima Kantona Sarajevo.*
- 2. Nacrt Zakona iz tačke 1. ovog zaključka stavlja se na javnu raspravu.*
- 3. Učesnici u javnoj raspravi su kantonalni organi uprave, jedinice lokalne samouprave, naučne i stručne ustanove, a trajat će 15 dana.*
- 4. Primjedbe, prijedloge, sugestije i mišljenja učesnici javne rasprave dostavljaju Vladi Kantona Sarajevo, koja organizuje i provodi javnu raspravu putem Ministarstva unutrašnjih poslova Kantona Sarajevo.*
- 5. Vlada Kantona Sarajevo je dužna, nakon provedene javne rasprave, Skupštini Kantona Sarajevo dostaviti izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženja razloga zbog kojih pojedine primjedbe, prijedlozi i mišljenja nisu prihvaćeni u pripremi, u pripremi Zakona o izmjenama i dopunama Zakona o unutrašnjim poslovima Kantona Sarajevo.*
- 6. Ovaj zaključak stupa na snagu danom donošenjem.*

***Realizacija tačke osam.***

**AD-8.**

#### **NACRT ZAKONA O IZMJENAMA I DOPUNAMA ZAKONA O POLICIJSKIM SLUŽBENICIMA KANTONA SARAJEVO**

Zastupnicima je materijal dostavljen uz poziv za sjednicu. Aklamativno su se složili da nema potrebe za uvodnim izlaganjem, niti je bilo prijavljenih za diskusiju.

*U skladu sa članom 94. Poslovnika Skupštine Kantona Sarajevo Skupština je većinom glasova prihvatila da se izjašnjavanje po ovoj tački provede odmah, (s 19 glasova „za“ i 2 glasa „suzdržan“).*

***Na osnovu rezultata glasanja konstatovano je da je Skupština po nacrtu Zakona o izmjenama i dopunama Zakona o policijskim službenicima Kantona Sarajevo većinom glasova (s 18 glasova „za“ i 2 glasa „suzdržan“) donijela sljedeći zaključak:***

- 1. Utvrđuje se nacrt Zakona o izmjenama i dopunama Zakona o policijskim službenicima Kantona Sarajevo.*
- 2. Nacrt Zakona iz tačke 1. ovog zaključka stavlja se na javnu raspravu.*
- 3. Javna rasprava održati će se u kantonalnim organima uprave, jedinicama lokalne samouprave, kantonalnim ustanovama, javnim preduzećima i trajat će 15 dana.*
- 4. Primjedbe, prijedloge, sugestije i mišljenja učesnici javne rasprave dostavljaju Vladi Kantona Sarajevo, koja organizuje i provodi javnu raspravu putem Ministarstva unutrašnjih poslova Kantona Sarajevo.*
- 5. Vlada Kantona Sarajevo je dužna, nakon provedene javne rasprave, Skupštini Kantona Sarajevo dostaviti izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Zakona o izmjenama i dopunama zakona o policijskim službenicima Kantona Sarajevo.*
- 6. Ovaj zaključak stupa na snagu danom donošenja.*

**Realizacija tačke devet.**

**AD- 9.**

**NACRT ZAKONA O NABAVLJANJU, DRŽANJU I NOŠENJU ORUŽJA I MUNICIJE**

Zastupnicima je materijal dostavljen uz poziv za sjednicu. uvodno izlaganje je podnio ministar unutrašnjih poslova, *Admir Katica*.

U diskusiji su učestvovali zastupnici: *Faruk Selmanović i Redžo Lemezan*.

*U skladu sa članom 94. Poslovnika Skupštine Kantona Sarajevo Skupština je većinom glasova prihvatila da se izjašnjavanje po ovoj tački provede odmah, (s 18 glasova „za“ i 2 glasa „suzdržan“).*

***Na osnovu rezultata glasanja konstatovano je da je Skupština po Nacrtu Zakona o nabavljanju, držanju i nošenju oružja i municije većinom glasova (s 19 glasova „za“ i 2 glasa „suzdržan“) donijela sljedeći zaključak:***

- 1. Utvrđuje se Nacrt zakona o nabavljanju, držanju i nošenju oružja i municije.*
- 2. Nacrt zakona iz tačke 1. ovog zaključka stavlja se na javnu raspravu.*
- 3. Javna rasprava održati će se u kantonalnim organima uprave, jedinicama lokalne samouprave, kantonalnim ustanovama, javnim preduzećima i trajat će 15 dana.*
- 4. Primjedbe, prijedloge, sugestije i mišljenja učesnici javne rasprave dostavljaju Vladi Kantona Sarajevo koja organizuje i provodi javnu raspravu putem Ministarstva unutrašnjih poslova Kantona Sarajevo.*
- 5. Vlada Kantona Sarajevo dužna je nakon provedene javne rasprave Skupštini Kantona Sarajevo dostaviti izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Zakona o nabavljanju, držanju i nošenju oružja i municije.*
- 6. Ovaj zaključak stupa na snagu danom donošenja.*

Predsjedavajući je dao petnaestominutnu pauzu prije realizacije tačke deset.

**NASTAVAK NAKON PAUZE**

**Realizacija tačke deset.**

**AD-10.**

**PRIJEDLOG ODLUKE O ZAŠTITI IZVORIŠTA VODE ZA PIĆE „DJEVOJAČKE VODE“**

Zastupnici su materijal dobili uz poziv za sjednicu, smatrali su da nisu potrebne uvodne napomene.

U diskusiji je učestvovala zastupnica *Marijela Hašimbegović*.

*U skladu sa članom 94. Poslovnika Skupštine Kantona Sarajevo Skupština je jednoglasno prihvatila da se izjašnjavanje po ovoj tački provede odmah, (s 20 glasova „za“).*

***Na osnovu rezultata glasanja konstatovano je da je Skupština jednoglasno donijela Odluku o zaštiti izvorišta vode za piće „Djevojačke vode“, (s 20 glasova „za“).***

### **Realizacija tačke jedanaest.**

#### **AD-11.**

### **NACRT PRIVREMENE ODLUKE O ZAŠTITI IZVORIŠTA VODE ZA PIĆE „SARAJEVSKO POLJE“**

Zastupnici su materijal dobili uz poziv za sjednicu, smatrali su da nisu potrebne uvodne napomene.

U diskusiji su učestvovali zastupnici: *Sanela Klarić, Marijela Hašimbegović i Elvis Vreto.*

*U skladu sa članom 94. Poslovnika Skupštine Kantona Sarajevo Skupština je jednoglasno prihvatila da se izjašnjavanje po ovoj tački provede odmah, (s 20 glasova „za“).*

*Zastupnici su jednoglasno podržali (s 20 glasova „za“) zaključak zastupnice Sanele Klarić, koji glasi:*

*„Traži se od Ministarstva privrede Kantona Sarajevo da u toku javne rasprave pripremi neophodno ažuriranje katastra potencijalnih i stvarnih zagađivača sa opisom i tačnim pozicijama u prostoru GIS baza.“*

***Na osnovu rezultata glasanja konstatovano je da je Skupština po Nacrtu Privremene odluke o zaštiti izvorišta vode za piće „Sarajevsko polje“ većinom glasova (s 18 glasova „za“ i 2 glasa „suzdržan“) donijela sljedeći zaključak:***

- 1. Utvrđuje se Nacrt Privremene odluke o zaštiti izvorišta vode za piće „Sarajevsko polje“.*
- 2. Nacrt Privremene odluke iz tačke 1. ovog zaključka stavlja se na javnu raspravu.*
- 3. Učesnici u javnoj raspravi su kantonalni organi uprave, jedinice lokalne samouprave, naučne i stručne ustanove, udruženja i građani, a trajat će 25 dana.*
- 4. Primjedbe, prijedlozi, sugestije i mišljenja učesnici javne rasprave dostavljaju Vladi Kantona Sarajevo putem Ministarstva privrede Kantona Sarajevo, koje organizuje i provodi javnu raspravu.*
- 5. Vlada Kantona Sarajevo dužna je nakon provedene javne rasprave Skupštini Kantona Sarajevo dostaviti Prijedlog Privremene odluke o zaštiti izvorišta vode za piće „Sarajevsko polje“, vodeći računa o primjedbama, prijedlozima, sugestijama i mišljenjima kroz izvještaj o provedenoj javnoj raspravi.*
- 6. Ovaj zaključak stupa na snagu danom donošenja.*

### **Realizacija tačke dvanaest.**

#### **AD- 12.**

### **NACRT ODLUKE O ZAŠTITI IZVORIŠTA VODE ZA PIĆE „PERAČKO VRELO“**

Zastupnici su materijal dobili uz poziv za sjednicu, smatrali su da nisu potrebne uvodne napomene, niti je bilo prijavljenih za diskusiju, te se pristupilo odmah izjašnjavanju.

***Na osnovu rezultata glasanja konstatovano je da je Skupština po Nacrtu Privremene odluke o zaštiti izvorišta vode za piće „Sarajevsko polje“ većinom glasova (s 18 glasova „za“ i 2 glasa „suzdržan“) donijela sljedeći zaključak:***

- 1. Utvrđuje se Nacrt Odluke o zaštiti izvorišta vode za piće „Peračko vrelo“.*

2. *Nacrt Odluke iz tačke 1. ovog zaključka stavlja se na javnu raspravu.*
3. *Učesnici u javnoj raspravi su kantonalni organi uprave, jedinice lokalne samouprave, naučne i stručne ustanove, a trajat će 30 dana, pardon, a trajat će 25 dana.*
4. *Primjedbe, prijedlozi, sugestije i mišljenja učesnici javne rasprave dostavljaju Vladi Kantona Sarajevo putem Ministarstva privrede Kantona Sarajevo, koje organizuje i provodi javnu raspravu.*
5. *Vlada Kantona Sarajevo dužna je nakon provedene javne rasprave Skupštini Kantona Sarajevo dostaviti Prijedlog Odluke o zaštiti izvorišta vode za piće „Peračko vrelo“, vodeći računa o primjedbama, prijedlozima, sugestijama i mišljenjima kroz izvještaj o provedenoj javnoj raspravi.*
6. *Ovaj zaključak stupa na snagu danom donošenja.*

Predsjedavajući je potom konstatovao da su sve tačke dnevnog reda iscrpljenje, te je zaključio rad na 29. Radnoj sjednici, zahvalivši se zastupnicima na konstruktivnom radu.

Broj: 01-04-6040/26  
06.03.2026.godine  
SARAJEVO

Zapisnik izradila:

Lejla Kadrić

**S E K R E T A R**  
**SKUPŠTINE KANTONA SARAJEVO**  
**Aida Zeković**

**P R E D S J E D A V A J U Ć I**  
**SKUPŠTINE KANTONA SARAJEVO**  
**Elvedin Okerić**

- 0 -

**Sastavni dio ovog zapisnika su stenografske bilješke, audio snimak sjednice, koji se čuvaju u Službi za skupštinske poslove Skupštine Kantona Sarajevo.**